

## Nwàk nè Ba, nè Pol à Còm Fa TIMATI

*Pol à còm ñwàk ènə ɲa yi cu mɔ ndapndzəmè yüiyi fana yi dzəm ɲgòyə Timati. A ye ɲa yi ri də mvə'nə yi nə kɔ kùrə laɲ. Yi à sə cèp ghak bə ntip sè ɲgòtsòho ncèp nè Nwì nə. Tu ncèp nè gɔgɔɲ nə nja də, ɲwè nè yi dzəm-a ɲgòye mofàk Jisòs nè zinə nə, yi tse' ɲgòye co sojà nè yi sə yu' duk. Yi ka tse' ɲgòkosə lo' marè'tu bohòɲkwà'ɲwè ye nè nà'a Jisos Krest nə. Yi tse' ɲgòye fəfəhù ɲgòyə ɲgə' bùu fàak ye sə (ye ɲgoo 1:8, 2:3, 2:12, 2:15, 3:11, 4:5).*

<sup>1</sup> Còm ñwàk nè'e mɔu Pol nè mɔ ɲgà ntum Jisòs Krest. Nwì a fàhɔ nòɲsə yi də mɔ ye ɲgà ntum ye. Fàk am yè'sə də mɔ sə tsoho fa bwiɲ bə nzak lùɲ nè nà' sə vè bohòJisos Krest nə. <sup>2</sup> Mɔ sə còm fa ɲwàk nè'e bohòwùu Timati mo àm nè sə ntɔu mɔ. Nwì nè yi tè' nə ye Jisòs Krest nè yi Tà àvèes gɔ wu bəboɲ, nə koksə manziɲ bohòwù, nə fa wu fifi sə ntɔu.

*Pol Kwe'sə Timati  
NgòFàk Gɔgɔɲ, Nə Kà Wəp*

<sup>3</sup> Mɔ kwasègè Nwì bùu wùu Timati. Mɔ sə fàk bohòyi bə ntum nè rərəɲ mvə'nə tè' am wèɲ à fàak. Mɔ lɛɲgè bohòyi maràɲ bə ndzəmè lònɲ də yi se wu ɲkùuɲntèn. <sup>4</sup> Mɔ tsərə ndzəplis yo sè wù a wa ghà nè vesù à gà'a yà'a, ntum àm sə gɔ mɔ co mɔ ye fe'lə wù sèmok ya mɔ kwa.

<sup>5</sup> Mɔ tsərə fe'ləgè mok sè' mɔvè'nè wù a fa ntum yòbohòJisòs bə nè zìnə. Macici yòLuwis ànə fa to ntum ve'nə yi, nə ye də ma yòYunis fa sè'. Mù rì də wu sè' ve'nə. <sup>6</sup> Mɔvè'nè mù rì də wu ve'nə fana mù dzəm də mɔ tsok fa wu yumok. Wu lumsə ɲkərə nè Nwì a fa wu ɲgòfàk bə zɛɲ ghà nè mù ànə naaɲ fa wu bo nà'a. <sup>7</sup> Rìɲtse' də Nwì a fa vesùwèɲ Yòɲsə ye nè Rərəɲ nè nà' gù ves a kà wɔə tse'. Nà' a fa ves ɲàɲ, nə gɔ a dzəm bwìɲ, nə sə ko ni'.

<sup>8</sup> Ye də kà də wu koksə marè'tu ɲgòtsòho fa bwìɲ liɲ sè Tà sə duk. Nə ye sè' də kà də wu koksə marè'tu bohòmù də bùusè mɔ ɲgà ndapndzəm sè' duk. Yusə də wu tse' le nsàp ntum nè ɲgòkè ye ɲgə' bùu Ntirè nè Bèboɲ nə sè'. Aco wù gɔ to yè'sə bə ɲàaɲ sè Nwii fa wu yà' yi. <sup>9</sup> A yi Nwì nə nè yi a lùɲsə ves, nə duk ves də a cum ncu nè nà'a rərəɲ. Yi à gù yè'sə, ka də a bùu yumok sè bəboɲ sè vesùwèɲ a gù yeɲ. Yi à gù fa ves yè'sə ndzə bohòJisòs Krest ɲga yi tsəm kok gu sə vèə yi bə bònəm ye ɲga nzenɲòn ka ntòyeto. <sup>10</sup> Nè niè' nè'e mɔvè'nè Jisòs Krest ɲgà lùɲsə bwìɲ a vè fana vesùwèɲ a rì mok bum sè Nwì a sə tsərə də yi nə gɔ sə. Yusə yi à vèə nə gɔ sə də yi à ghak ɲàaɲ kpɔ, nə jəɲ vè lùɲ nè nà'a nè kà mè yuk mɔvwe' jəja. Mandzè nè yi à jə vè nà' à ye bə Ntirè nè Bèboɲ nə.

<sup>11</sup> Nwì a naaɲ fa mɔ bo mɔ tuhù də mɔ tsoho sè' Ntirè nè Bèboɲ ènə. Mɔ sè' ɲgà ntum zɛɲ, nə sə yə'rə fa bwìɲ sè' zɛɲ. <sup>12</sup> Nà'a njo nè mù sə yə ɲgə' nə. Megu də marè'tu sə kà mɔ ko bùusè mù rì ɲwè nè mù a dzəm bohòyi nə bəboɲni. Mù rì

tse' sè' pap də yi tse' nàaŋ sè ɲgònòŋsə bum sè m̀a a fa yà' ndzə bohòyi sè tètè kə dzeŋ nùmbu ànə nè yi nə bwi və. \*

<sup>13</sup> Wù à yuk ncèp nè zìnə nè nà'a bə liŋ Jisòs Krèst nə bohòm̀ə laŋ. Jəŋ ɲkərè də wu sə yuŋ megu zeŋ. Wu sə g̀ə vɛ'nə, wù sə fa ntəm bohòNwì, nə sə dzəm bwìŋ bùusè wu ɲwəə Jisòs Krèst. <sup>14</sup> Ncèp nè Nwì a fa ndzə bohòwù ènə gu ntəŋ wù kà f̀ak. Fana ye də wu jəŋ ɲkərè də ɲwə nəmòok kà nà' kupsə bupsə. Yòŋsə nè Rəreŋ nè nà' cu ndzə ni'ì vès nə nə tesə wu ɲgòg̀ə vɛ'nə.

<sup>15</sup> Wù rì də bùu sè mvwe' lak Esiyà pwe' a mè'rə tes m̀ə m̀m̀ə. F̀ugelòbə Emoginìs a mè'rə m̀ə sè'. <sup>16</sup> ɲwə nè yi vesi mègù Onesiforòyiìyi. Yi g̀ug̀è ntəm àm sə ye fəfup. Yi kà marè'tu bə kwan am yè'e sè' koksəg̀ə. M̀ə tsəm də Tàa nə se ndap ye bə nsàp nè yi sə g̀ə ànə. <sup>17</sup> Yi à kə dzèŋ mvwe' lak Rumà, yi lap fok kɛ'ca m̀ə vɛ'ɛ tètè yi ye mvwe' sè m̀ə cu. <sup>18</sup> M̀ə sə ləŋ də Tà Nwìi gu Tà Jisòs ɲgòkoksə manziŋ bohòyi nùmbu ànə nè yi nè bwìŋ vəə. Wù rì mvè'nə yi à sə tesə m̀ə ghà nè m̀ə à ye mvwe' lak Efesòyà'a-e bəboŋni.

## 2

### *Ngə' Nè Ngà F̀ak Nwì Nə Ye*

<sup>1</sup> Wùu Timati mo àm, təəŋ guguŋ bə nàaŋ sè Jisòs Krèst fag̀ə bùu ye wèŋ. <sup>2</sup> Wù à yuk bum sè m̀ə a sə yə'rə kɛ' mvwe' bwìŋ yà'a; jəŋ yà',

\* **1:12** 1:12 Aco ncèp ènə sə duk də, <<Yi tse' nàaŋ sè ɲgònòŋsə bum sè yi a fa yà' ndzə bohòm̀ə sə.>>

nə yə'rə bwi fa bùu sè wo zìnə nə ye kèkurè. Bùu yè'sə wèŋ nə jəŋ yà', nə yə'rə bwi fa bùu mok wèŋ sè'. <sup>3</sup> Ye ŋgə' ma nǝco sojà nè bəbɔŋ bohòJisòs Krest. <sup>4</sup> Wù rì də ŋwè nè yi sojàa kà ncu ye co ŋwè nè la'à mok cugè. Yi cugè ncu nje ŋgògù də ŋkwà'ŋwè ye sə kwa. <sup>5</sup> Tsərə fe'lə-a mòk co ŋgà cacəŋ-è. Aco wo də yi gha' bwiŋ yi, ŋga yi ka lùuk sè wo nòŋsəgè də ŋwèe caŋ ve' bə ve' sə pwe' nonse à? <sup>6</sup> Ngà fàk nzum nè yi fàkgè ve'ε bə nàaŋ tse' togè bum sè yà' tesə múnzùu fi yi. <sup>7</sup> Tsərə bum sè mù tsè' fa wu yè'sə bəbɔŋ. Tàa nə gu wu wù rɛɛŋ bə zəŋ pwe'fo'.

<sup>8</sup> Kà swì də Jisòs Krest nè yi à tesə bohòbùu Devid à lòkok mvwe' kpɛ. Nà'a Ntirè nè Bəbɔŋ nè mù sə tsòho fa bwiŋ nə. <sup>9</sup> Yà'a yusè mù sə yəè nə ŋgə' bùu zəŋ sə. Wo tasə mu yè' bə kwan co ŋwè nè yi bupsə yumok. Megu də kaco wo tasə to Ntirè nè Bəbɔŋ nə yeŋ. <sup>10</sup> Fana mù sə ye lo yàm ŋgə' mantombi bùusè bùu sè Nwì a cokfis wo yè'sə sè ntèŋ. Mə gu ve'nə ya wo dzəm bohòJisòs Krest fana Nwì fa wo lùŋ nè nà'a nè kà kè mè yuk nə. Fana wo nè kè tse' bum sè bəbɔŋ sè yà'a nè kà mè yuk, sè Nwì a nòŋsə fa bùu Jisòs wèŋ sə. <sup>11</sup> Ncèp mòok nè', nè nà' a zìnə, aco wù riŋ yòsè' də a ve'nə, də,

A kpɛ-a ves Krest,

A nə lokok be'lə sè' vesiwèŋ.

<sup>12</sup> A təŋ be'lə-a venəwèŋ cùk,

A sak gaŋ ye sè' venəwèŋ.

A kà-a yi də yi nè njàvès jə,

Yi kà ves də vesùwèŋ sè ye sè' jə.

<sup>13</sup> Vesùwèŋ kà-a zìnə bohòyi ye,

Yi mègù ye ñwè nè yi yegè ye zìnə.  
Kaco yi dzeen yuk ni' ye yen.

*Fàk Co Nwì Dzəm Də,*  
<<Ñ, Wù Sə Fàak>>

<sup>14</sup> Gù bùu yo wèn ñgòtsərə tse' bum yà'sə, nə kà swì. Cèp bohòwo, nə soŋ wo ntu' bəboŋ mənə liŋ Nwì də wo kà mvək bə ncèp cùu sè də ñwè nè'e rìŋ ghak yi kè nà'a àlɛ' sə càsə. Nsàp ànə ka fàk tse', nà'a bupsəgè bùu sè wo yuk yà' bupsə. <sup>15</sup> Jihi nzòn, nə gù fàak yo bəboŋ ya Nwì dzəm də <<Ñ, wù sə fàk mummvè'nə.>> Ye nsàp ñwè nè kaco marè'tu tesə sənə fàak yo yen, nə ye ñwè nè wù rì ñgòkotse' ncèp nè Nwì nə bə mandzè nè bəboŋ. <sup>16</sup> Yusə də, kà də wu tse' bo sənə nsàp taŋgàam ləm sè yà' ka fàk bohòNwì tse' yà'a duk. Mù duk vɛ'nə bùusè yà'a jə fəsə lògè bwìŋ mvwe' mandzè Nwì maŋkwèn, maŋkwèn. <sup>17</sup> Nğàam awo yà'sə yegè co nsàp mvwe' nè nà'a kà mègè, nə sə jək logè mantombì nà'a. Himiniyàs bə Filitù sə yərə bwìŋ nsàp bum yà'sə. <sup>18</sup> Wo a jàm mè'rə mandzè nè zìnə nə laŋ. Wo sə duk kɛ'cà də ñgòlòkok mvwe' kpɛ à cà lòmè laŋ. Wo gù vɛ'nə fana bùu mok wèn ye ñgòmərə də zìnə nə ñga'a nè fòlɛ. <sup>19</sup> Bwìŋ sə mərə-a sè vɛ'nə fana bùu Nwì wèn nə təŋ gugɛŋ co kùumndap, yà'a nè kà kupsè yuk. Ngi ncèp nè wo còm naaŋ mbwa nə də, <<Tà rì bùu sè yà'wèen sè ye. Nwè nè yi də yi bɛ' mandzè Tà Jisòs lòon, yi cokfis ni' ye sənə bup.>>

<sup>20</sup> A yegè munda'à ñgà ghàk wù ye bum sè ñgògèsə zuzù mbwa zəzok. Mok sə yà' gù nteŋ.

Mok sè ka nteŋ guḡuŋ yeŋ co kùuŋ ncàk ve'ε. Sè yà' gu nteŋ sə, wo fis mègù ya' nùmbu nzu. Mok sə ye sè wo zə bum ca ḡhà nè fòlòoŋ nzak kà ye. <sup>21</sup> Ye də a ye-a ŋga ŋwè cokfis gesə ni' sənə bəp yè'sə pwe' fana yi nə ye mok co yu gèsè zuzə nè nà' gu nteŋ. A ve'nə bùusè yi mok rərəŋ. Yi tse' mok fàk. Yi mok kəkùrè co də ŋgà ndap nə gu fàk bə zeŋ nùmbu nè sə bà bàa pwe'. <sup>22</sup> Ye də wu caŋ gesə mvwe' ŋgùu wàhabwìŋ sè yà'a jə lògè wo ŋgògù bəp yà'a. Jihi nzòŋ ŋgòkè gù mègù yusè yà'a kəkùrè, nə sə naaŋ tu bohòjisòs guḡuŋ, nə tse' dzədzəm bohòbwìŋ, nə ye bə fifi. Wu gù ve'nə ye də wù sə gù sè mvè'nè bùu sè wo yù Tà bə ntəm nè mò'fis sə gùu. <sup>23</sup> Kà də wu gesə cùu yo sənə bum ləm sè jì ŋkərè sè bwìŋ sə cèep duk. Wù rì yòsè' də nsàap bum yà'sə jə vè mègù ŋkùəm. <sup>24</sup> Ŋgà fàk Tà Nwì ka tse' ŋgòye ŋwè nè yi sə li ni ke' sənə ŋkùəm yeŋ. Yi nə ye tsoŋ ŋwè nè fùè bohòbwìŋ pwe'. Yi tse' ŋgòye sè' ŋwè nè yi rì ŋgòyərè bwìŋ bèboŋ, nə ye fe'lə sè' ŋgà kontəm. <sup>25</sup> Yi ye nsàp ŋwè nè bwìŋ bèn-a yusè yi cèep, yi rəŋsə yà'wèŋ bə fùè. Yi gu ve'nə, bùusè kàmòk aco Nwì kupsə ntuum bùu yà'sə wèŋ wo riŋ zìnə nə. <sup>26</sup> Ya ŋga ŋkərè awo bwìŋ vèə, wo caŋ tesə sənə tam Satà nè yi ŋgà bòrè bwìŋ. Tam nè yi anə kotse' yà' ca də yà'a sə yuk bohòyi nə.

### 3

*Bum Sè Bwìŋ Nə Sə Gu Ŋga Jisòs Kuəp NgòVèə*

<sup>1</sup> Mù dzəm də wu rɛɛŋ də ghà nè Jisòs kuəp  
 ŋgòbwìŋ vèə, ŋgə'ə nə ye ve'ɛ wùrìŋ. <sup>2</sup> Busə  
 bwìŋ nə sə gɔ bɔp wùrìŋ. Bwìŋ nə sə dzəm  
 megu ni' awo, nə sə dzəm mbàm; wo nə sə dzəm  
 ŋgòtsòho ke' də mu ve'ɛ bə ve'ɛ, nə sə ne ni'. Wo  
 nə sə yak ke'cà bwìŋ. Bweŋke' wèeŋ nə kà ma  
 bə tè' mok sè' yuk. Bwìŋ kà ntəm nè ŋgòkwəsə  
 ŋwè mok sè tse', nə kà Nwì sè' wəp. <sup>3</sup> Bwìŋ nə  
 kà bùu awo sè munda'à wo sè' sə dzəm. Bwìŋ  
 nə sə tse' ntəm sè gɔgɔŋ. Bwìŋ nə sə ci' fa bùu  
 mok wèŋ mvwès. Bwìŋ nə sə gɔ lo bum mvè'nè  
 wo dzəm nduk. Bwìŋ nə sə ye ŋgàa ŋgwap, nə  
 kà yumok sè yà'a bəbɔŋ dzəm lok. <sup>4</sup> Bwìŋ nə sə  
 borə bwìŋ. Bwìŋ nə kà duk sə yuk, nə ye ŋgàa  
 koksə-ŋkwèŋ. Wo zɛ nzeŋgòŋ, nə kà mvək bə  
 yusə yà'a bəbɔŋ bohòNwì tse'. <sup>5</sup> Wo nə sə gɔ  
 megu bum Nwì ma mɔŋgùp ni'i, fana nə sə beŋ  
 bwi ŋaəŋ sè yà' cu nja sə. Kà ŋge' weŋ nsàp bù  
 ànə ko lok. <sup>6</sup> Yà'a nsàp bù nè wo gorə ni munda'à  
 bwìŋ bə ŋkərè. Wo ni ve'nə, nə ci' ko baa sè wo  
 lo'. Baa yè'sə wèŋ bə' ku' tse' bɔp bə marè'tu  
 ndzə ni'i wo nə sə jip ke' bə zeŋ. <sup>7</sup> Wo sə dzəm  
 ŋgòyərè rì bum, nə kà zìnə nə rì yuk. <sup>8</sup> Nsàap  
 mbəmbaam sè ve'nə yè'e ka zìnə tse'. Wo yà'sə  
 co bùu sè liŋ awo də Janè bə Jambri, sè wo à sə  
 dzèeŋ duk Musi. Nkərèə awo a bɔp yà'sə laŋ  
 fana wo tse' dzədzəm nè nà' a jabu. <sup>9</sup> Yusə də  
 wo nə kà səsap lònŋa bwìŋ ko mbwèe awo laŋ.  
 Yà'a sè' mvè'nè bùu sè ba yà'a à ye fana bwìŋ ko  
 mbwèe awo.

*Pol Tipsə Timati*  
*NgòTəəŋ Cək Bə Zìnə Nə*

<sup>10</sup> Bohòwù yòTimatì, wù à rì zìnə nə bohòmù. Wù rì yusè mù sə yə'rə fa bwìŋ, nə riŋ ncu àm, nə riŋ fe'lə yusè mù sə dzəm ɲgògùu. Wù à yə mvè'nè mù à fa ntəm àm bohòNwì, nə ye mvè'nè mù fàè, nə sə dzəm bwìŋ, nə ye məm̀vè'nè ɲgə' à sə vè bohòmù, mù təəŋ mali gugũŋ. <sup>11</sup> Wù rì sè' mvè'nè bwìŋ a yeŋsə mù ɲgə' mvwe' bòop lak sè co Antiyòk bə lak Akonòm bə lak Listà. ɲgə'ə sè yà' à vè bohòmù pwe' mù à təəŋ gugũŋ fana Tà Jisòs nə fis gesə mù ca lòoŋ. <sup>12</sup> A zìnə də, ɲwè nè yi dzəm-a ɲgòbɛ' mandzè Jisòs bə zìnə ye pwe', yi nə tse' tsoŋ ɲgə' bohòbwìŋ. <sup>13</sup> Bùu sè bup sè wo duk bòrəgè də wo dzəm Nwì yà'a nə sə bup ghaha lo ghaha. Wo nə sə borə bwìŋ ɲga wo sə bòrə wo yàwo sè' bòrə. <sup>14</sup> Nə ye də wùu Timatì, dù mali mantombi bə zìnə nè wo à yə'rə wu, wù dzəmtse' cək nə. Tsərə tse' bùu sè wo à yə'rə wu. <sup>15</sup> Tsərə tse' sè' də wù à rì yè jə ɲwàk Nwì ɲga wù cu ntòm̀m̀wɛŋke'. ɲwàk Nwì ènə zɛŋ nè aco nà' jə lo to wu ɲgòrì ɲkərè, nə kə tse' lùŋ nè nà'a nè kà mè. Nà' tse' ɲgòjə lo wu vɛ'nə ɲga wù fa ntəm yòbohòJisòs Krest. <sup>16</sup> Bum sè wo à còm yà' ndzənə ɲwàk Nwì lòoŋ fo', à tesə vè bohòNwì. Yà' tse' fàk ɲgòyərə fa bwìŋ zìnə. Nə tse' fàk ɲgònì fa bwìŋ yusè yà'a jòn. Nə tse' fàk ɲgònitsè' fa bwìŋ ɲgòtesə sənə jòn, nə təəŋ fe'lə rərəŋ səmok. Nə tse' fe'lə fàk ɲgòyərə fa bwìŋ mandzè ncu nè nà'a kəkùrè. <sup>17</sup> Fana yà' gu ɲwè nè yi fàk bohòNwì pwe' kà yusè yi tse' ɲgòrìi jamè. Fana yi ye kəkùrè ɲgògù nsàp fàk nè fòpwe'fo' nè nà'a bəboŋ.



## 4

*Pol Ta Fa Timati Kpu*

<sup>1</sup> Timati, so'rə ntu' bəboŋ, nə yuk ncèp nè'e. Mù sè cèp bohòwù gəgəŋ mantombii Nwi nə ye Jisòs Krest nè yi nè sak ndàaŋwè pwe'. Yi nə sak bù kpukpu bə bùu sè wo cu ŋwəm. Njo nè yi nè vè ŋgòkè sak gaŋ ye fana mù duk wu də, <sup>2</sup> Tsoho ncèp Nwi nə ghà nè fòlòŋ, ŋga mvè'nè sè bòo nə ye mvè'nè sə bup mwè pwe' wù tsòho. Sa'rə bùu yo wèŋ ya wo teŋsə bup awo sè wo sə gùu. Kwe'sə wo ya wo gu bum bə mandzè nè nà' a ye bəboŋ. Ko ntəm nə kà teŋsè, nə sə yə'rə wo sè'. <sup>3</sup> Busè mvək sə vèə nè bwìŋ nə kà yəyərè nè nà'a zìnə yu'rè. Wo nə sə yuŋ lo gu yusè yà' sè bòwo. Wo nə sə to benə cicàa sè wo dzəm, də ya yà'wèŋ yə'rə fa wo nsàap bum sè sè bòwo co wo yuk zeŋ. <sup>4</sup> Wo nè kà ŋgòyu'rə yusè yà'a zìnə mok dzəm. Wo nə dzəm ŋgòyu'rə ke'cà maŋgəŋgèŋ sè wà. <sup>5</sup> Nə ye də bohòwù yò, ko ni' yò, nə təəŋ bə ŋkərè ghà nè fòlòŋ. Ŋgə' vè-a bohòwù, wù ko ntəm. Sə gu fàha yo co fəŋgəri nə. Gù fàha sè Nwi fa wu ŋgògù lòŋ sè'.

<sup>6</sup> Bohòmù yàm, mvək njàm nè ŋgòkpu kùrə laŋ. Kpu àm nə nà'a co mù sè fè' mà' fa Nwi dzè rùk nè fi. <sup>7</sup> Mù a lù ma njàm bəboŋ laŋ, mù a ca ca àm nə kə mesə sè' bəboŋ. Mù tə malì bə zìnə àm nə. <sup>8</sup> Nè ŋga'a nè'e, lèlək àm cu yo bùusè mù a gù mvè'nè Nwi sə dzəm sə. Tà Jisòs Krest nè yi sakgè bum kəkùrè nə nè fa mu nà' nùmbu nè yi nè vèə. Yi nə kà nsàp ènə bohòmù fa mègù,

yi nə fa ndaanwè pwe' nè yi tes lis mandzè bə kwəkwa ηgòkùk nùmbu nè yi nè bwìη vèə ànə.

### *Pol Fa Lèsə Timati Ntip*

<sup>9</sup> Láp mandzè, nə və kə ye mɔ jəjo yè'sə.  
<sup>10</sup> Dimà a mè'rə nònɔsə mɔ nè' mɔmɔ. Yi dzəm ηgòbɛ' lòmègù mok bum sè bəbɔη sè sə nze fən. Yi a lòyuye mɔwɛ' lak Tètàlonikà. Kresèη a lòye mɔwɛ' lak Gàlesiyà fana Taitòs lo ye mɔwɛ' nzenɔŋ Dàlmasiyà. <sup>11</sup> Luk cu mègù vesi mok yìyi. Wu cu ηgònèə, wù jə və Mak, bùsə aco yi tɛsə mɔ bə fàk. <sup>12</sup> Mù a tum lòTìkikòs mɔwɛ' lak Efesò. <sup>13</sup> Wu vèə, wù jə və fa mɔ cək àm nè mù à mè'rə nà' mɔwɛ' lak Truwà bohòKàpònà'a. Jə və fa mɔ ηwàak am sè'. Nə jə və fa mɔ ηwàak fàk am sè ya' tse' liη yà'a ntèn. <sup>14</sup> Alèsandà ηgà tɛηlám nà'a a gù mɔ bɔp nsàp nè wù kà fùk. Nwìi nè làk fəsə yi sè' mɔvè'nè yi a gù mɔ. <sup>15</sup> Sə gi yòbohòyi sè' bə ηkərè. Búsə yi a cèp ηgògù bɔpsə Ntirè nè Bəbɔη nə vɛ'ɛ bə ηàη.

<sup>16</sup> Mvè'nè mù à təəη to mɔ kot mantombi fa' ηgòfi'lə ncù am yà'a, wo pwe' à mè'rə tes mɔ mɔmɔ. Mù lɛη Nwì də yi kà wo yumok bùu zen gù! <sup>17</sup> Tà Jisòs à ye gù fo' vesi yi. Yi à sə fa mɔ ηàη fana mù tsóho rì to ncèp nə pwe'fo', ya bù lakmɔvum wèeη yuk nà'. Yi a caηsə gɛsə mɔ mɔwɛ' cùu gwim. <sup>18</sup> Tà Jisòs nə caηsə gɛsə mɔ mɔwɛ' bɔp pwe', nə jəη lo mɔ bəbɔη mɔwɛ' lak ye sè mɔbu mɔwɛ' dzè' ηkum ye. Kəkùksəə ye bohòyi, nə kà mè yuk. Yà'a ye vɛ'nə.

### *Càcèpsə Nè Nà' Lèsə Mbwè*

<sup>19</sup> Cèpsə fa mɛ Prìsiliyà bə Akwilà. Cèpsə fa mɛ bɛ mɛnda'à Onesiforòlòŋ. <sup>20</sup> Èratòs cu maligè ye yà' mɛwe' lak Korè. Mɛ a mè'rə Tròfimù mɛwe' lak Mìlitù ŋga yi nòyiyan. <sup>21</sup> Jihi nzòŋ nə və ŋga mɛk mɛbɛŋ ka ntòvə. Èbulòbə Pudèn bə Linùs nə ye Klaodiyà wèŋ cèpsə wu bəbɛŋ. Bwema sè fɛŋ sə pwe' cèpsə wu sè'. <sup>22</sup> Tà Jisòs sə kùk yòŋsə yò. Bòvəm nə Tà nə ye bohòwù sè'.

**Nwàk Nwì Ma Rùk Nè Fi**  
**New Testament in Yamba**

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 22 Feb 2024 from source  
files dated 29 Jan 2022

c475d5b3-da44-51cf-93ca-f255b72fe481